

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- डोडा जिले च आतंकवादिणं कन्नै लग्गे दे टाकरे च दरुं सैनिक जख्मी ।
- डोडा च आतंकी संगठने कोला बाहर रेइयै उंदे लेई कम्म करने आले ओवर ग्राउंड वर्करें दे गिराह खलाफ कारवाई करदे होई पुलसै 4 जनं गी हिरासतै च लैता ऐ ।
- केन्द्र सरकार दे पिंशनी होने जा'रदे मलाजमें लेई कल जम्मू च रटैरमेंट कोला पैहले परामर्ष आली 54मीं कार्जशाला दा सरिस्ता कीता जाग ।
- सुप्रीम कोर्ट अज्ज नीट-यूजी 2024 आले विवाद सरबंधी दायर याचिकाएं दे इक बैच दी सुनवाई करोग ।

<><><><><><>

## Encounter Doda

डोडा जिले दे जंगली इलाकें च सुरक्षाबलें ते आतंकवादिणं बश्कार टाकरा भखी गोआ ऐ। एह टाकरा रातीं 2 बजे काश्तीगढ़ इलाके च शुरू होआ। आतंकवादिणं सरकारी स्कूल च कायम सुरक्षा बलें दे आरजी शिविर पर गोलियां चलाइयां। एह आरजी शिविर चला'रदे तपाशी अभियान दे चलदे कायम कीता गोआ हा। इस टाकरे च 2 सैनिक घायल होए न। खीरी खबरं थ्होने तगर दपक्खी गोलीबारी जारी हीं देसा ते एह्दे आले दुआले दे जंगलेंच तपायी अभियान चलाया गोआ हा। सोमवार ते मंगलवार दी मझाटली रातीं भखे दे टाकरे च सेना दे चार जवान शहीद होई गे हे ।

<><><><><><>

## OGW Arrested

जम्मू कश्मीर पुलस नै डोडा जिले च होए दे आतंकवादी हमले दे सरबंधै च आतंकवादी संगठन थमां बाहर रेइयै उंदे लेई कम्म करने आले ओवर ग्राउंड वर्करें दे गिरोह दा पता लाया ऐ। इस दरान 4 ओवर ग्राउंड वर्करें गी गिरफ्तार कीता गोआ ।

आकाशवाणी जम्मू संवाददाता दी रिपोर्ट मूजब पुलसै हाल दे आतंकवादी हमलें दी पछोकड़ै च कारवाई चलाई। पुलस नै 12 जून गी गंदोह पुलस थाने च केई दफाएं तैहत एफआईआर दर्ज कीती ही। मगरा पुलस आस्सेआ कारवाई शुरू कीती गई। इस दरान ओवर ग्राउंड वर्करें मुबशिर हुसैन, सफदर अली ते सज्जाद अहमद गी गिरफ्तार कीता गेआ। एह लोक इसलै पुलस दी हिरासतै च नं गंदोह पुलस थाने च 26 जून गी इक होर एफआईआर दर्ज कीती गई ते शौकत अली गी गिरफ्तार कीता गेआ। ओह पुलस दी हिरासत च ऐ ते अगड़ी जांच-पड़ताल कीती जा'रदी ऐ।

<><><><><><>

Jatinder Singh

पिंशने सरबंधी मामले ते पिंशनी आई चुके दे मलाजमें दी भलाई बेहतरी सरबंधी मैहकमा इस म्हीने दी 19 तरीक गी जम्मू दे कन्वेंशन सेंटर च रटैरमेंअ कोला पैहले आले परामर्श सरबंधी 54मीं कार्जशाला दा सरिस्ता करा करदा ऐ। एह कार्यशाला प्रधानमंत्री हुंदे दफतरे च राज्यमंत्री ते पिंशनरें ते कार्मिक मामले दे मंत्री डॉ. जितेन्द्र सिंह हुंदी मजूदगी च लोआई जाग। इस कार्यशाला च निकट भविक्ख च रटैर होने आले मलाजमें गी पिंशन मंजूरी दी प्रक्रिया ते रटेरमेंट दे बाद हासल होने आले फायदे दे बारे च जागरूक कीता जाग। मैहकमा केन्द्र सरकार दे मलाजमें लेई इस चाल्ली दे कार्यक्रम आयोजत करदा ऐ तां जे उनेंगी रटैर होने कोला पैहले गै सारी प्रक्रियाएं दे बारे च दस्सी दित्ता जा तां जे समें सिर उंदी पिंशन बी लग्गी जा ते कन्नै रटैर होने दे बाद आले सारे लाह बी एह मलाजम हासल करी सकन। इस कार्यशाला च केन्द्र सरकार दे रटैर होने आले ते सीएपीएफ दे रटैर कोई ढाई सौ मलाजमें दे हिस्सा लैने दी मेद ऐ। इस दरान भविष्ण पोर्टल, संगठित पिंशनर पोर्टल, फमली पिंशन, रटैरमेंट दे बाद आले लाह, इंकम टैक्स नियम, अनुभव, डिजीटल लाइफ सर्टीफिकेट, पैहे दे निवेश ते इस चाल्ली दे बक्ख-बक्ख विषयें पर विशेष सत्र लोआए जांगन जिंदे राएं इनेंगी पूरा पूरा लाह दोआने हासल करने च सखाल होग।

<><><><><><>

Amarnath Yatra

जम्मू दे भगवती नगर आले आधार शिविर थमां 4 जहार 383 श्रद्धालुएं दा इक होर जत्था अज्ज बडलै श्री अमरनाथ जी दी यात्रा लेई घाटी लेइ रवाना होआ। एह सारे श्रद्धालु 157 गड्डिडएं दे काफले च सुआर होइयै अगड़ी यात्रा लेई रवाना होए।

इस जत्थे च 3 ज्हार 222 मर्द, 1 ज्हार 71 महिलां, 8 बच्चे, 67 साधु ते 15 साध्वियां शामिल न। कुल 4 ज्हार 383 श्रद्धालुएं चा 1 ज्हार 701 बालटाल लेई ते 2 ज्हार 682 पहलगाम लेई रवाना होए, जित्थुआं ओह अपनी अगड़ी यात्रा लेइ रवाना होंगन।

<><><><><><>

## SC-New Judges

भारत दे मुख् न्यायधीश डी.वाई.चन्द्रचूड़ होर अज्ज न्यायमूर्ति एन.कोटेश्वर सिंह ते न्यायमूर्ति आर.महादेवन होरें गी सुप्रीम कोर्ट दे जज दे तौर पर सगंध दोआंगन। राष्ट्रपति द्रौपदी मुर्मू होरें इनें नियुक्ति गी मंजूरी दित्ती ही। इनें नियुक्तिएं कन्नै सुप्रीम कोर्ट च मुख् न्यायधीश डी.वाई.चन्द्रचूड़ सनें 34 जजे दी पूरी क्षमता ब्हाल होई जाग। सुप्रीम कोर्ट कॉलेजियम नै जम्मू कश्मीर ते लद्दाख हाई कोर्ट दे मुख् न्यायधीश एन. कोटेश्वर सिंह ते मद्रास हाई कोर्ट दे कार्यवाहक मुख् न्यायधीश आर.महादेवन होरें गी सुप्रीम कोर्ट च लाने दी सिफारश कीती ही।

<><><><><><>

## External Affairs

विदेश मंत्री डॉ. एस.जयशंकर होरें कल मॉरिशस च भारत दे पैहले ऐसे जनऔषधि केन्द्र दा उदघाटन कीता जेहड़ा विदेश च स्थित ऐ। मॉरिशस दे प्रधानमंत्री प्रविंद कुमार जुगनाथ बी इस मौके पर उंदे कन्नै हे। सोशल मीडिया पर इक पोस्ट च डॉ. जयशंकर होरें आखेआ जे इस औषधि केन्द्र दी स्थापना दा वादा प्रधानमंत्री नरेन्द्र मोदी होरें इस बारे च शुरू कीता हा जिसी हुन पूरा कीता गेआ ऐ। उनें इब्बी आखेआ जे भारत-मॉरिशस दे ग्रैंड बोआ खेत्तर च भारत दी आर्थिक मदाद कन्नै बनी दी मैडिकलिनिक परियोजना दा बी उदघाटन कीता ते इसी आपसी दोस्ती दी हालिया अभिव्यक्ति करार दित्ता। इस मौके पर डॉ. जयशंकर होरें आखेआ जे मैडिकलिनिक खुल्लने कन्नै ग्रैंड बोआ खेत्तर च 16 ज्हार लोकें गी माहिराना इलाज दियां सेवां बी मिलगंन। इस पर गर्व मसूस करदे होई विदेश मंत्री होरें आखेआ जे सेहत साढ़े सब्बनें लेई प्राथमिकता दा खेत्तर ऐ ते एह्दे प्रति अस सब्बै जागरूक होए आं।

<><><><><><>

## SC-NEET Hearing

सुप्रीम कोर्ट च अज्ज नीट अंछर ग्रेजुएट 2024 मतेयान दे विवाद कन्नै जुड़ी दिएं याचिकाएं दी सुनवाई तैह कीती गई ऐ। एहदे शा पैहले जंदी 11 जुलाई गी सर्वोच्च अदालतै एह मतेयान रद्द करने परतियै मतेयान करोआने ते इस मतेयान दे आयोजन च कथित गड़बड़िं दे मामलें सनें सब्बनें याचिकाएं पर सुनवाई स्थगित करी दित्ती ही। अदालतै केन्द्र सरकार ते एनटीए दी तरफा किश धड़ें गी जोआब नेई दित्ते जाने गी दिक्खदे होई सुनवाई अगड़ी पाई दित्ती ही। प्रधान न्यायधीश डी.वाई.चन्द्रचूड़, न्यायमूर्ति जे.बी.पारदीवाला ते न्यायमूर्ति मनोज मिश्रा हुंदी खंडपीठ 40 शा मती याचिकाएं पर सुनवाई करोग। इंदे च बक्ख-बक्ख हाई कोर्टे च बकाया मामलें गी सुप्रीम कोर्ट च भेजने दे सरबंधें च एनटीए दी तरफा दायर कीती गेदियां याचिकां बी शामिल न।

<><><><><><>

## Kishwar ISRO

किश्तवाड़ जिले थमां 10 विद्यार्थी गी गुजरात दे अहमदाबाद स्थित इसरो दे स्पेस ऐप्लीकेशन सेंटर च शैक्षणिक दौरे पर भेजेआ गेआ ऐ। किश्तवाड़ दे जिला शिक्षा ते सिखलाई संस्थान डाईट दे प्रिंसिपल प्रलहाद भगत ते वरिष्ठ अधिकारिं इनें विद्यार्थिं गी अगड़ी यात्रा लेई जम्मू रवाना कीता, जित्थुआं अगगे एह बच्चे रेल राएं दिल्ली ते फही अहमदाबाद जांगन। इस दौरे दरान विद्यार्थिं गी इक बक्खरे ते टकोहदा अनुभव हासल होग। एह दौरा प्रदेश थमां बाहरली थाहरे गी दिक्खने, सुनने ते उंदे बारे जानने सरबंधी जतन तैहत किश्तवाड़ दे डिप्टी कमीशनर डॉ. देवांश यादव हुंदी दिक्ख-रिक्ख च करोआया जा'रदा ऐ। डाईट किश्तवाड़ ते इसरो दी सांझ-भ्याली राएं बच्चें गी अपनी किताबी पढ़ाई ते असल दुनिया बश्कार वित्थ गी पूरने लेई टकोहदा अनुभव हासल होग जेहड़ा उनेंगी मता किश सिक्खने समझने दा मौका देग।

<><><><><><>

## Fencer

जम्मू कश्मीर दी इक नामवर तलवार बाज श्रेया गुप्तानै न्यूजीलैंड दे क्राइस्ट चर्च च चलै करदी राष्ट्रमंडल जूनियर ते कैडेट चैंपियनशिप 2024 च तलवार बाजी दी साब्रे श्रेणी च अंतराष्ट्रीय सतह पर पैहला पैहला तगमा अपने नां कीता ऐ। शुरुआती मकाबले च शानदार प्रदर्शन करदे होई उनें इंग्लैंड दी सौंडर्स निकोल गी 15-3 कन्नै हराया, ओहदे बाद मैडल दे मकाबले च रेया नै आस्ट्रेलिया दी हार्डगे गाला गी 15-13 कन्नै हराइयै कैह दा तगमा पक्का करी लेआ।

ओहृदे बाद खेड्डे गेदे सैमीफाइनल दे इस जबरदस्त मकाबले च श्रेया गी सिंगापुर दी जुलिअट माइंक दे हत्था 15–13 कन्नै होर दा सामना करना पेआ। श्रेया नै एहृदे शा पैहले 2018 च न्यूकासट च जित्त राष्ट्रमंडल कैंडेट चैंपियनशिप ते 2022 च लंदन च आयोजित जूनियर फेसिग चैंपियनशिंप च बी कैह दा तगमा जित्ते दा ऐ। युवा सेवाएं ते खेड्डे सरबंधी मैहकमे दे सचिव सरमद हफीज ते जम्मू कश्मीर खेड्ड परिषद दिएं सचिव सचिव नुजत गुल होरें जम्मू कश्मीर खेड्ड परिषद दी इस एथलीट गी ममारकबाद दिंदे होई उसी भविक्ख लेई शुभ कामनां दित्तियां न।

<><><><><><><>

## River Rafting

सरहृदी जिले पुंछ च सैलसफा ते साहसिक गतिविधिएं गी बढ़ावा देने लेई जिल प्रशासन नै ऐकती बी रिवर राफिटिंग अभियान दी शुरूआत कीती ऐ। इस पैहल दा मकसद पुंछ जिले दी सैलसफा दी समर्थ टकोहृदा करियै इत्थें साहसिक खेड्ड गतिविधिएं दिएं उपलब्ध संभावनाएं ते सुविधाएं गी उजागर करना ऐ। इस अभियान दी शुरूआत अतिरिक्त जिला विकास कमीशनर संदेश कुमार शर्मा होरें झंडी दस्सियै कीती। उनें आखेआ जे जम्मू कश्मीर च रिवर राफिटिंग दी बड़ी मतियां संभावना न जेहृदे नै इत्थें साहसिक सैलसफा गी बड़ा मता बढ़ावा थहोग। उनें आखेआ जे हून जियां श्री बुड्डा अमरनाथ जी दी यात्रा बी शुरू होने आली ऐ, ओहृदे चलदे सैलानी यात्रा दे इलावा रिवर राफिटिंग दा बी नंद लेई सकदे न। जिला प्रशासन नै “गो–वाइल्ड नां दे संचालन आस्सेआ आयोजित गतिविधिएं लेई इस संगठन दी सराहना कीती जेहृडा इस इलाके च साहसिक खेड्ड गतिविधिएं दे आयोजन च प्रशासन गी सैहयोग दिंदा आ करदा ऐ।

<><><><><><><>